



Die Rietstok

22ste Nuusblad van Streek Rietvallei
Maart 2013

Hallo al die Rietstok leser

Nou ja, kom ons begin by die begin, met 'n paar hoogtepunte vir die 1ste drie maande van 2013.

Rietvallei en sy lede het gekamp (in die wonderlike natuur), saam gekuier en elke keer geleenthede gehad om ons Christenskap te kan uitleef. Hier bedank ons die Boodskappers wat die Boodskap gebring het asook al ons gewillige kampkommandante.

Daar was die Senior Burgersaamtrek te Mopani, waar lekker gekuier, asook geëet was, dan was daar die 3de Jeugnaweek te Mopani. Dit was wel deur minder jeug as seniors bygewoon, maar hul het gewys hul kan – dis nou die seniors, van skattejag, waatlemoenfees en waterspeletjies. Monateng was soos gewoonlik baie gewild en moes ons ekstra staanplekke aanvra, ook bevoorreg gewees om 4 besoekende lede te ontvang. Was die kermispoedingtafel te Monateng nie ook 'n hoogtepunt nie? Bosfontein, wat hierdie jaar nie as 'n winterkamp gebruik is nie, was 'n groot sukses gewees weens die goeie opkoms (16 woonwaens plus 2 besoekers).

Neem asb kennis dat die AJV te Tamboti verskuif word na Liracia Oord, weens die agteruitgang van Tamboti.

Verteenwoordigende bestuur het die oop NUB vergadering (Nasionale Uitvoerende Bestuur) by Bloekompoort bygewoon waar 'n paar interessante besprekings plaasgevind het. Die 1ste Gebiedsvergadering is deur Tjaart en Hans bygewoon waar insette ontvang en gegee is.

Ben en Annatjie de Klerk, Fanie en Elsette Jacobs en Pieter en Elmarie le Roux is as nuwe lede verwelkom, terwyl Mel en Lettie Ueckermann ook vanaf Waterberg oorgekom het. Oom Willem en Tannie Marthie Momberg het ook hul lidmaatskap hernu en is weer Rietvalleiers in murg en been. Johan en Elna Redelinghuys het bedank en het hul dank oorgedra aan al die lede met wie hul al saamgekamp het. Willie en Rensha Breytenbach het ook bedank as lede van SAWA.

Verskeie aansporingsplaatjies is aan lede oorhandig as erkenning en lede-gaste was in die tydperk verwelkom terwyl hul saam met ons gekamp het. Verskeie kommunikasie is gedeel met lede, en hier speel Erna en die RIETSTOK (ons eie nuusbrief) asook die web'n groot rol. Kommunikasie en besprekingsdetails oor ander saamtrekke soos Manyane, Presidente ens is op datum deurgegee. Die nuwe klerereeks het groot byval gevind en lede word versoek om die brosjure op ons web te gaan besoek, plaas jul bestellings by Reinier om voortdurende prysverhogings te vermy.

Indien jul hoor van enige goeie oorde, kommunikeer dit na ons toe sodat dit oorweeg kan word in die 2014 jaarprogram.

Met groot genade het ons nie enige lewensverlies onder ons lede gehad nie, dankie daarvoor.

Gaan besoek gerus ons webtuiste vir getuienis vir die meeste van bogenoemdes!

<http://www.sawa.org.za/?Task=system&CategoryID=26528&HeadingText=Rietvallei>

Groete
Tjaart



Rietvallei Bestuur 2012/13

Voorsitter

Tjaart Klaasen 082 785 6895
tjaartjk@absa.co.za

Ondervoorsitter

Hennie Engelbrecht 082 601 5914
henniee@netactive.co.za

Penningmeester

Lucille van den Berg 082 784 8528
lucille227@gmail.com

Sekretaris

Marietjie Klaasen 072 423 6445
mmklaasen@gmail.com

Redakteur

Erna Koekemoer 082 324 3396
koekoem@gmail.com

Kampkoördineerder

Hans Koekemoer 082 5657896
erhans@absamail.co.za

Jeugverteenwoordiger

Wayne Botha 083 607 0928
wayne@witklippies.co.za

Senior Burgerverteenwoordiger

Margriet van den Berg
082 586 0480
wavdberg@telkom.co.za

SAWA Webblad:

www.sawa.org.za

Inhoudsopgawe

- Voorsittersbodskap
- Redaksioneel
- Pitkos
- Lief en Leed
- Kampnuus
 - * Mopani – Januarie
 - * Monateng – Februarie
 - * Bosfontein – Maart
- Senior Burger hoekie
- Jeugnuus en –dinge
- Toekennings
- Nuusbroggies
- Wenke
- Haak die woonwa
- Knuppeldik
- Op ligte noot
- Kampprogram
- Adverteer

Redaksioneel

Wanneer 'n mens so 'n terugblik gee oor die eerste drie maande van die jaar, staan so baie slegte en negatiewe gebeure voorop in die gedagte, daarvoor sorg die televisie en radio. Goeie nuus? Ja, wanneer 'n mens die koerant van voor tot agter deurlees kom 'n mens tog af op insidente en gebeure wat 'n mens weer hoop gee vir ons mense. Ons as Sawaante het geleentheid om aan ander hoop te gee – ons kan dit ons doel maak om uit te reik na ander. Ons kan ons weer vir 'n naweek by 'n kamp kom volmaak met meelewendheid en naasteliefde en dit prakties gaan uitleef waar ons beweeg.

'Doen soveel goed as wat jy kan, op soveel maniere as wat jy kan, op al die plekke wat jy kan, op al die tye wat jy kan, aan al die mense wat jy kan, solank as jy kan.' John Wesley

Robbie kom uit 'n baie moeilike huis. Mens kan sê 'n slechte huis, 'n huis sonder 'n pa, met 'n ma wat die meeste van haar lewe onder die invloed van drank was. Sy het vir Robbie baie slech behandel, het hom soms genadeloos geslaan, hy het dikwels nie veel gekry om te eet nie, want daar was nie geld nie. Robbie het egter gewonder hoe sy die drank en sigarette kon gekoop het. Hy het vir 'n paar jaar skool toe gegaan, maar hy was altyd gespot en sleggesê en het uiteindelik begin stokkiesdraai en wegblê van die skool af. Daar was dikwels mans by sy ma, maar hy het nie geweet of een van hulle dalk sy pa was nie.

Daar was dikwels mans by sy ma, maar hy het nie geweet of een van hulle dalk sy pa was nie. Toe hy sy ma eendag vra waar sy pa was, het sy gesê dat rubbish soos hy nie 'n pa kan hê nie So het die een oom hom Robbie Robbish begin noem en lustig deelgeneem aan die mishandeling. Op een dag kon Robbie net nie meer nie, toe loop hy weg. Hy het homself belowe dat hy nooit weer sal terugkom nie en op die straat begin lewe. Met bedel, kos soek op vullishope en soms iets uit 'n winkel steel, het hy aan die lewe gebly. Hy was vry ... so het hy gedink.

Robbie het baie van Jesus gehoor. By die skool het hulle 'n Bybelperiode gehad, maar by die huis het hy die naam Jesus ook gereeld gehoor, wanneer sy ma kwaad was en dit uitgeskree het. Dit het hom verwarr, want by die skool het hy gehoor van Jesus se liefde, maar by die huis het hy gedink dis 'n vloekwoord. Nadat Robbie weggeloop het, het hy soms gewonder of iemand na hom soek. Hy het nooit weer huis toe gegaan nie en op die straat gelewe. Robbie het in 'n stegie geslaap onder goed wat hy op ashope opgetel het. Diep in sy hart was iets goeds geskryf wat hy nooit verstaan het nie. Hy het probeer om niemand skade aan te doen nie. En toe, op een goeie dag, kom daar mense van 'n kerk en hy kry die grootste geskenk van sy lewe: 'n splinternuwe kombers en 'n sakbybeltjie. Omdat hy nie goed kon lees nie, het hy maar saans net so bietjie daarin rond geblaai. Die een naam wat heeltyd opgeduijik het, was Jesus. Hy het meer en meer begin wonder wie dit was. Daar was 'n ouer man wat ook in die stegie geslaap het. Sy naam was Dave. Dave het vir hom vertel dat hy 'n geleerde ou is en op Universiteit was, maar die lewe het sy rug op Dave gedraai en hy is uit sy gesin uit en het ook 'n boemelaar geword. Maar Dave was slim en het geweet van die Bybel. Hy het dit ook gereeld gelees en soms met Robbie oor Jesus gepraat. Hy het gewens Dave was sy pa.

Eendag het Robbie verby 'n kerk geloop en daar was 'n groot bord met die woorde: "Jesus is die antwoord". Maar hoe goed hy ook al op die bord gelees het, het hy nie geweet wat die vraag is nie. As Jesus dan die antwoord is, wat is die vraag? Dit het hom verwarr. Een Sondagoggend het hy buite die kerk gestaan en luister na die prediker wat gepraat het oor liefde. Maar hy het nie geweet wat liefde is nie. Dié aand het hy vir Dave gevra wat liefde is. Dave het gesê: "Jesus is liefde". Toe is hy nog meer verwarr oor die vraag. Hy het 'n antwoord, maar nie 'n vraag nie. Een aand het Robbie vir Dave gevra hoekom mense vir Jesus ken en hy wat Robbie is, nie. Hy het ook nie verstaan hoekom dit net ryk mense is wat vir Jesus ken nie. Eendag het hy weer buite die kerk gaan luister en gehoor die pastoor praat oor die wet. Dié aand het hy vir Dave gevra om dit vir hom te lees. **Eks 20:1-17** - dit was egter vir Robbie die spyker in die doodskis. Hy het nie sy ouers geëer nie, hy het sy ma gehaat. Hy het soms iets gesteel; hy het nie God geëer nie, hy het dikwels gelieg as hy gebedel het. En hy het begeer – veral as hy gesien het hoe iemand smul aan iets lekker. Toe sê hy vir Dave: "Ek kan nie hierdie goed doen nie. Ek is te sleg. Dit is nie vir my nie". Dave het toe hierdie woorde gesê: "Robbie, Jesus is die antwoord". Robbie het amper omgeval, want toe kry hy die vraag van die antwoord. Dave het verder vir hom verduidelik: "Omdat jy nie kan nie, kan Jesus. Jesus is die antwoord op alles". Robbie het besluit hy gaan hierdie pad probeer.

Daardie aand het Robbie sy ma vergewe, onvoorwaardelik. Dave het vir hom die Onse Vader gebed gelees en hy het verstaan waar sy daaglikse brood vandaan kom. Die volgende oggend het Robbie nie wakker geword nie. Dave het hom gekry met 'n salige trek op sy gesig. Yskoud. Hy het in sy slaap gesterf. Hy was op die beste plek.

Dave het by homself gedink, Robbie was geen rubbish nie, want God maak nie rubbish nie, al het Robbie dit in sy kort lewe geglo. Hy het ook geweet Robbie glo nou anders. Hy het gewonder hoekom die Here vir Robbie so vroeg in sy lewe kom haal het. Hy het egter vertroosting gekry in Lukas 16, die deel oor Lazarus en die ryk man. Luk. 16:22: "*Toe die arm man te sterwe kom, is hy deur die engele weggedra na die ereplek langs Abraham*". Hy het ook gedink aan die reëltjie uit die lied Starry Starry Night (wat oor die lewe en sterwe van Vincent van Gogh gaan): "But I could have told you, Vincent (Robbie), this world was never meant for one as beautiful as you". Robbie was nie 'n Robbisch nie. Jy is ook nie, weet jy? Want die Here maak nie robbish nie. Dis teen die aard van Sy liefde. Ten spyte van swaarkry en moeilikheid, bly Hy steeds die antwoord, ongeag wat jou vraag is. Hy bly altyd die antwoord op alles. Die probleme gaan nie noodwendig altyd weg nie, maar Jesus is steeds die antwoord. Altyd. En of ek en jy ons lewe lank die Here dien, of net-net betyds die Here vind, soos Robbie, is ons uiteinde dieselfde. There is no disappointment in heaven!

Lief ...

- Die Klaasen-gesin asook die Hill-gesin spog met splinternuwe woonwaens. Baie geluk en mag jul baie veilige kilometers aflê met jul nuwe woonwaens.
- Willem en Marnette se dogter is Maartmaand getroud. Baie geluk aan julle en aan jul kinders.
- Baie geluk aan Jacques Fourie wat die toekenning van Junior Fotograaf van die Jaar ontvang het van die National Photography Club wat by Photography Society of SA (PSSA) geregistreer is. Hy het die toekenning ontvang toe hy 3-ster gradering gehad het (junior fotograwe) maar het intussen sy 4-ster gradering verwerf.

en leed

- Oom Pieter Reitz is opgeneem in 'n semi-selfversorgingseenheid en dit gaan onder omstandighede redelik goed met hom. Ons bede bly by hom vir sy gesondheid en onderskraging na tannie Joan se afsterwe.
- Mynhardt Marais het sy suster en Tertia Fourie het haar broer afgestaan aan die dood. Ons wens jul sterkte toe met jul verliese.
- Sonja de Jongh het 'n voetoperasie ondergaan maar kamp al weer volstoom.
- Ingrid Maas het 'n maagoperasie ondergaan maar het goed herstel.
- Ben van Eeden het ook 'n ongemaklik besering opgedoen toe hy gevallen het. Ons is dankbaar om te sien dat Ben darem nou weer makliker beweeg.
- Alta van Eeden het 'n oogoperasie ondergaan en na sy aanvanklik gesukkel het om te sien met die oog, is die oog baie beter.
- Tannie Rina de Klerk se voet het sodanig herstel dat die skroewe verwyder kon word.

In Memoriam



Ons dink met mooi herinneringe aan Tannie Joan wat deel was van Rietvallei vanaf 14 Junie 2004. Oom Piet en Tannie Joan het 24 kampe bygewoon en het met oorgawe by alle aktiwiteite ingeskakel. Ons sal haar onthou as 'n vriendelike en deernisvolle mens, haar plekkie gaan leeg wees.
Ons groet u Tannie Joan!

SAWA Rietvallei

Kampnuus

Mopani

16 – 18 Januarie 2013 - Senior Burger Saamtrek

18 – 19 Januarie - Streekskamp & Jeugkamp

Rietvallei se 2013 kampprogram is ingelui deur die senior burgers wat reeds die voorafgaande dae voor die naweek saamgetrek het. Die naweekprogram is dan ook vir die derde keer deur die jeug beplan en ten spyte van gure weer het daar steeds 12 jonges-van-dae, waarvan 5 gaste was, kom kamp. Soos oudergewoonte het die jonges-van-gees (Aka. seniors / kierie-korps) in groot getalle opgedaag. Die Vrydagaand is bobotie en rys verkoop en die jonges-van-dae het die kampopening, boekvat en algemene afkondigings behartig.

Ten spyte van die bietjie reën Saterdagoggend het die jonges-van-dae allerhande speletjies gespeel en die jonges-van-gees het spontaan deelgeneem. Later die middag is 'n skattejag gehou, en dit was moeilik om te sê wie dit die meeste geniet het. Op 'n stadium was daar bekommernis dat 'n groepje jonges-van-gees dalk verdwaal het, maar hulle het wel op eie stoom hulle pad terug gevind. Teen laatmiddag wou die son so bietjie kop uitsteek en daar is van die geleentheid gebruik gemaak om so 'n bietjie om die kamp deur die veld te stap voor die reën dalk weer uitsak. Dit was nogal iets besonders om te sien hoeveel met kaalvoete die pad aangedurf het (moet byvoeg die pad was lekker sanderig met geen dorings en klippe vir die sage stadsvoete nie).

Die jonges-van-dae het die aand stokbrood gebraai, en die saambraai is weens die reën vinnig omskep in 'n buurvrou-braai (die streek het teen einde verlede jaar uit buurmanne gehardloop om te braai).

Sondagoggend se kerkdiens is gevolg deur 'n waatlemoenfees, waarna almal op hulle eie tyd opgepak en huistoe vertrek het, tot 'n volgende kamp.



MONATENG: 15 – 17 FEBRUARIE

Na 'n dolle gejaag gedurende die week sit ons met groot verwagting af na Monateng vir 'n welverdiende blaaskansie en al die aangename aktiwiteite wat gepaardgaan met Rietvallei se kamppnaweke. Hennie en Anne-Marie was al besig om die lekkerste vetkoek en maalvleis te verkoop en Daan en Elize het sommer ingespring om hand by te sit. Na 'n pragtige rooi sonsondergang was dit boekevat-tyd en is die naweek begin met 'Wat 'n vriend het ons in Jesus'. Vrydagnag se swaar donderweer het ons nogal benoud gehad en die verligting was groot toe daar net 'n ligte reëntjie uitgesak het.

Sommige senior kampeerdeers het ook al van Donderdag saamgekom en 'n ete vir Valentynsdag is ook gou geprakseer deur die dames om die 'ou manne' weer 'n bietjie aansporing te gee. Saterdagoggend vroeg al het dit weerklink met vrolike lag en gejil van die swembad se kant af. Die swembad het dan ook baie aftrek gekry op die besonder warm dag. Ongelukkig het Richard Botha seergekry op die glygeut na 'n stukkie veselglas sy toon ingedring het en moes pa Wayne en ma Anne-Marie hom vinnig by die hospitaal kry vir behandeling. Ons was dankbaar dat hulle later weer by ons kon aansluit met 'n baie bleek Richard. Vir diegene wat die krokodilplaas wou besoek was daar 'n besoek gereël van die oord se kant en vragsmotors het die belangstellendes geneem om ook te gaan kyk wanneer die krokodille gevoer word. Hennie en Denise het ook laatmiddag bingo aangebied waaraan geesdriftig deelgeneem is – 'n paar deelnemers het soms bietjie oorboord gegaan en gedink dat hulle die 'jackpot' geslaan het wat vir baie pret gesorg het.

Boekevat daarna het ook dan weer die grootheid van God en Sy skepping benadruk en die gebruiklike buurmanbraai het daarna gevolg. Die Sondagoggenddiens is deur Jacques Fourie waargeneem terwyl die jeug bymekaar was vir DisCo. Tydens die naweekafsluiting is verskeie saamtrekplaatjies oorhandig, nuwe lede verwelkom en inligting deurgegee aangaande die presidente-saamtrek, verskeie verjaarsdae gedurende Februarie en is Hennie gelukgewens met sy verjaarsdag.

Daar was 'n goeie opkoms van 23 lede, 1 gas en 4 besoekers van ander streke. Daan het die afkondigings met 'n sterk gebed afgesluit en die naweek is op 'n hoogtepunt afgesluit met die aptytlike poedings wat op die tafels verskyn het en die verkope het fluks gevorder. Daarna is die oggend so lui-lui onder die koeltebome verwyl en so algaande is opgepak om huiswaarts te keer.



Bosfontein 8 – 10 Maart

Ons kon nie wag om Vrydag baie vroeg in die pad te val nie omdat die kamp vir my 'n eerste was. Maar hoe groot was die ontnugtering toe Margriet skakel en ons die nuus mededeel dat ons nie voor tweeuur die middag sou toegelaat word om die kamp binne te gaan nie. Ons het toe maar stadig aangestoot na Bela-Bela om daar 'n middagete te gaan nuttig. Na ete het ons toe besluit om maar aan te ry en dan daar te gaan wag. Groot was ons verbasing toe ons so teen eenuur daar aankom en 'n hele paar woonwaens reeds sien wat al 'n geruime tyd klaar opgeslaan staan.

Nietemin was daar dadelik helpers by om ons woonwa reg te stoot en afdak op te slaan. Na Vrydagaand se Boekvat het ons heelik weggeval aan worsbrode (die wors was buitengewoon smaaklik en van 'n baie goeie gehalte), en daar is heelik onder mekaar gekuier tot laat die aand.

Saterdag het ons ook maar gebruik om lekker onder mekaar te kuier en te klets (natuurlik die dames). Die jeug (en die nie-meer-jeug) het baldadig in die swembad baljaar. Net nadat ons die vuur aan die brand gekry het, het daar 'n heelik reëntjie geval, maar afgesien daarvan het ons almal tog lekker saam gebraai. Daar was ook lekker roomys deur die jeug verkoop en die groot mense het hulle omtrent daaraan vergryp. Sondag het ons, soos ons gewoonte is, 'n Boodskap aangebied deur Wayne Botha. Wayne het op sy eie 'n baie treffende boodskap vir ons gebring. Daarna het ons afgesluit met 'n lekker drinkding en die nodige soetgoed in die vorm van koek en lekkernye. Opslaan om terug te ry was weereens maar traag.



Senior Burgerhoekie

Monateng - Valentynsete 14 Februarie 2013

Wie het ooit gesê dat seniorburgers nie meer romanties kan wees nie? Geensins - Twaalf seniorlede het toe by Monateng die teendeel bewys! Geen restaurant kon by ons kers vashou nie!

Rooi tafeldoek, hartservette, rooi kerse, rooi harte in vase gerangskik, tot rooi sjokolade-harte van klein tot groot het die tafels feestelik versier.

Die ete was natuurlik onverbeterlik! By die pragtige tafels het die twaalf toe heerlik gekuier, gelag en ge-oe en ge-a. Die ete was dan natuurlik ook die hoogtepunt (bring en eet). Ons drankies is in silwer wynglase bedien en by al hierdie heerlikhede het ons die pragtige natuur om ons gehad, asook 'n skoon hemelruim waar 'n vingerhaelmaan en sterre vir ons geknipoog het.



Van ons senior lede gaan weer die woonwa haak om 'n lekker toer te onderneem. Die Kruinetour se program is as volg:

- | | |
|---------------|--|
| 16 - 18 April | Badplaas |
| 19 - 21 April | Barberton |
| 22 - 24 April | Merry Pebbles in Sabie |
| 25 - 28 April | Panorama in Graskop |
| 29 - 01 Mei | Blydepoort |
| 02 - 03 Mei | Die Eiland Spa |
| 04 - 07 Mei | Magoebaskloof Ruskamp |
| 08 - 11 Mei | Marekele Nasionale Park by Thabazimbi. |

As alles volgens plan verloop sal die toergroep DV op 12 Mei weer terug wees by die huis.

Jeugnuus en -dinge



Tydens die saamtrek by Monateng is sertifikate oorhandig aan die jeuglede wat gedurende kampe betrokke was met reëlings en aktiewe deelname tydens jeugnaweke. Die idee daaragter is om deelname aan te moedig en sodoende jeuglede se potensiaal te ontwikkel. Dit gaan die proses vergemaklik om dan ook die Rietvalleiertjie van die Jaar te identifiseer.

Nou vir lekker speel...blaas briljante borrels!!

Gewone seepborrels is prettig en pragtig maar is gewoonlik klein en bars maklik. Nou kan jy reuse borrels blaas wat langer hou. Jy het net 'n mengsel van skoonmaakmiddel, water en gliserien nodig. Die skoonmaakmiddel en water maak die borrels groot en die gliserien keer dat die water verdamp (wat die borrel laat bars). Hierdie borrels is so groot en sterk dat jy selfs nog borrels binne-in hulle kan blaas!

So maak mens:

- Voeg twee dele gliserien by 15 dele vloeibare skoonmiddel om jou ekstra sterk borrel te maak. Voeg dan stadig 15 dele water by. Roer liggies om te meng sodat dit nie skuim nie.
- Bedek mengsel en laat paar dae staan. Dit sal verseker dat die mengsel se molekules deeglik meng. Hoe langer jy dit los, hoe beter sal dit werk wanneer jy borrels blaas.
- Vra pappa om stukke van 'n draadhanger te knip, in lusse te buig van verskillende groottes. Die maklikste manier is om die draad om rande voorwerpe soos 'n koffieblik te buig en die punte dan om mekaar te draai om 'n handvatsel te maak.
- Gooi die seepmengsel in 'n houer uit as dit goed gemeng is. Dompel die draadlusse daarin en swaai dit deur die lug. Hoe groter die lus hoe groter sal die borrel wees.

Borrels in borrels

Neem 'n gewone koeldrankstrooitjie en dompel een punt in die mengsel nadat jy 'n groot borrel geblaas het. Sit die ander punt in jou mond (moenie die mengsel insluk nie). Druk die nat kant van die strooitjie versigtig in die groot borrel en blaas om 'n tweede borrel binne-in die eerste een te maak.

Vra asb vir pappa of mamma om julle te help om die regte mates af te meet.

Rietvallei toekenning

Bywoningsplaatjies toegeken aan lede:

Lede	Streek	Algemeen
Hennie en Annemarie Engelbrecht	120	
Corne en Georgina de Wagenaar	10	
Tinus en Tersia Fourie	10	
Rudie en Mia Crous	20	
Reinier en Lucille van den Berg	50	
Neels en Rina de Klerk		125
Mel en Lettie Ueckermann	100	120

Nuusbrogkies

- ❖ Die nuwe kampdrag, 'n blou gholfhemp en knopiehemp en 'n keuse van warm baadjies (met Rietvallei logo geborduur), is bekendgestel. Bestellings kan deurgaans by Reinier van den Berg geplaas word.
- ❖ Enigeen wat belangstel om 'n advertensie in die nuusbrief te plaas kan dit met die bestuur reël. 'n Tarief van R200 per jaar word gehef vir 'n minimum van 4 plasings.
- ❖ Die jaarlikse Presidente kamp het plaasgevind te Klipdraai oor die Paasnaweek 29 Maart – tot 01 April 2013.
Graag bedank ons die volgende lede en borg wat bydraes gemaak het asook geskenkings vir die Presidente:
 - Spesifiek die seniors, wat bygedra het tot die artikels wat aan die senior burgertafel geskenk was.
 - Tinus Vorster van Foil Forever, wat verskeie van sy unieke produkte geskenk het.
 - Chris en Ansie Delpot asook Jacques en Diana Fourie, vir die vervoer van die artikels.
- ❖ 'n Nuwe struktuur is aan streeksvoorsitters voorgehou wat moontlik kan behels dat die gebiede sal ophou bestaan. Die nodige grondwetwysigings geniet tans aandag en dit sal in Oktober aan die Sawa-kongres vir goedkeuring voorgelê word. Die bestaande streke sal dan pro-rata onder nasionale voogde ressorteer. Streke sal nie geraak word nie.
- ❖ Daar is nog tafeloeke met al die streke se wapens op beskikbaar by die SAWA kantoor.
- ❖ **Spesiale aanbieding/te koop**

Howling Moon Gazebo met drie sykante - is nog in 'n goeie toestand saam met 'n sak.

R1500.00. Kontak Ben de Klerk by: Kantoor: 012 365 2860 Sel: 078 200 0963

e-pos: ben@dkmlaw.co.za

Die volgende nuttige inligting verskyn op SAWA se amptelike webblad:

Betekenis van die klein merkers langs die pad!!

Wat beteken daardie vreemde klein merkers langs van ons nasionale paaie? Op al ons hoofpaaie kan hierdie kort paaltjies met “vreemde” padtekens al langs die pad gesien word. Ongelukkig is te min motoriste bewus wat hierdie roete merkers en die syfers daarop beteken en hoe belangrik dit kan wees in ‘n noodsituasie op die pad!

Dit is belangrik vir die padgebruiker om die volgende oor die bordjies te weet:

- Dit is ‘n SANRAL (Suid-Afrikaanse Nasionale Padagentskap) standaard vir alle nasionale paaie.
- Daar word ‘n spesifieke formaat gebruik ten opsigte van die spesifieke merkers.
- Die merkers word elke 200 meter geplaas.



Wat beteken die inligting op die merkers?

N4 = roete waarop gereis word bv. N4

8X = duि die gedeelte van die pad aan waarop gereis word bv. 8X.

68,0 = duि die kilometer posisie aan op die gedeelte van die roete.

E = duि die rigting aan waarin gereis word, bv. East/Oos.

Die TRACASSIST noodnommer, elke twee km, kan geskakel word vir bystand indien die voertuig onklaar raak of in ‘n botsing betrokke was.

Padteken langs N4 (links)

Die merkers is van onskatbare waarde wanneer ‘n noodsituasie ontstaan. Dit help die noodpersoneel om presies te weet waar die incident gebeur het wat dan ook bepaal vanwaar die naaste hulp uitgestuur sal word.

Die persoon wat vir hulp skakel, kan na die naaste merker stap en die inligting met die persoon by die oproepsentrum deel.

Die oordra van akkurate inligting in die geval van nood kan verseker dat mediese bystand vinniger verleen kan word en die minute beteken tussen lewe en dood!

Inligting met erkenning aan SANRAL (Suid-Afrikaanse Nasionale Padagentskap)

Padteken langs N3 (regs)



Haak die wa...van toe tot nou

Die woonwabedryf het sy grondslag gehad en het in werklikheid reeds begin in 1836 met die Groot Trek van die Voortrekkers wat met waens en osse uit die Kaap getrek het . Juis van daardie tyd af het families 'n leefwyse aangeneem van kamp en op hierdie manier hul woonhuis op wiele saamgetrek. Hierdie was 'n passie en 'n groot liefde alhoewel ons kan wonder hoe geforseer dit was, gesinne moes in klein kompartemente saambly en mekaar verdra onder alle omstandighede. Gelukkig is dit nie wat ons vandag ondervind in die woonwabedryf nie.

Sover vasgestel kan word het die eerste saamtrek met woonwaens soos ons dit ken in 1928 in SA plaasgevind. Die 'Good Sam Club' het met enkele woonwaens in SA aangekom en wou dan 'n toer hou vanaf Kaapstad na Kairo. Nêrens lees ek of hulle wel hierdie rit voltooi het nie maar hulle het wel vanaf Kaapstad deur die ou Suidwes-Afrika getrek. Die hoeveelheid woonwaens is ook nie bekend nie. Gedurende hierdie selfde jaar is daar 'n foto in die besit van Jurgens van 'n persoon wat 'n tent bo-op 'n sleepwa opgeslaan en op hierdie manier gekamp het. Ek glo daar is heelwat van ons ouers /grootouers wat gedurende hierdie jare in tente gekamp het Braaivleis was beslis die in-ding toe, vandag en more. Die eerste woonwaens is vervaardig op 'n produksielyn in 1947 deur oom Eddie Andreas wat die Andrea woonwa vervaardig het. Hierdie woonwa het dan in 1953 bekend gestaan as die Gypsey woonwa. Die Jurgens familie kom in SA aan gedurende hierdie tydperk en oubaas Jurgens met sy 2 seuns, Dirk en Rieks, het toe vir Eddie Andreas gewerk. Hulle breek toe weg en gedurende Mei 1952 vervaardig hulle dan hul heel eerste woonwa wat bekend staan as die Jurgens woonwa en wat toe die begin was van die eerste groot produksielyne wat gevestig word in Suid-Afrika.



Min het ons besef hoe groot hierdie naam, nie net in Suid-Afrika sou word nie, maar wêreldwyd. Alvorens ons daar kom het daar egter heelwat gebeur. Woonwaens in Suid-Afrika het 'n traandrappelvorm gehad vanaf 1952 tot in 1958. In hierdie tydperk is woonwaens vervaardig van hout en masonite as buitebekleedsel. Die derde woonwa wat vervaardig is is nog steeds te sien by die Jurgens fabriek en word dikwels by skoue vertoon. Vanaf 1958 tot 1978, vir 'n periode van 20 jaar het daar nie veel gebeur wat buitelyne aanbetref nie behalwe wat kosmetiese veranderinge was.

In die sewentiger jare het die brandstofkrisis vervaardigers forseer om dringend na nuwe ontwerpe te soek om woonwaens meer aerodynamies asook liger te maak. Sleepvoertuie het kleiner geword en ook liger. Die eerste lae profiel woonwaens wat huis gebruik is om brandstof te bespaar word deur die CI-groep vervaardig in 1976 naamlik die Caravette. Jurgens daarenteen het gedurende hierdie tydperk baie polistereen gebruik ten einde hout te verminder binne die woonwa se sykantkonstruksie en sodoende gewig te verminder. Eers in 1978 bring hul 'n lae profiel woonwa uit saam met hulle aerodynamiese reeks wat, soos in die volksmond bekend staan, die omgekeerde woonwa. Hierdie was seker een van die grootste veranderings en het so die bedryf gestimuleer.

Woonwaparke het gegroeи vanaf die eerste woonwapark in die vyftigerjare waar die Gilloolys interseksie vandag is en later verskuif is na 'n terrein in Bezuidenhoutsvallei huis om plek te maak vir die snelweg. Die getal parke het gegroeи tot 'n totaal van 872 woonwaparke in SA waarvan 'n groot gedeelte besit en bestuur was deur munisipaliteite. Gedurende 1980 het een van die Jurgens broers naamlik Rieks Jurgens besluit om sy aandele te verkoop aan sy broer Dirk en gedurende die tyd het hy ook begin met sy eie woonwareeks naamlik Aerocar, 'n baie liggewig woonwa waarvan 'n klant self die uitlegplan kon kies binne die woonwa. Op hierdie stadium was daar ongeveer 38 woonwaverwaardigers in SA. Gedurende 1982 het die Jurgens familie gevoel dat daar buitekapitaal nodig is ten einde die Jurgens fabriek verder uit te brei en hulle verkoop die maatskappy aan 'n groep met die naam van Terexco onder leiding van Neels Swart. Later jare in 1989 word die maatskappy weer verkoop aan Michael Delport wat uit die inmaakomgewing kom maar wat werklik 'n groot invloed met sy denkwyses op die woonwabedryf gemaak het.

Hy verskuif gedurende 1990 die fabriek vanaf die bekende perseel in Kempton Park na Garankuwa en het intussen 'n paar ander vervaardigers soos Slipstream, Gazelle, Sprite, Gypsey en Wilk ingesluk. In Garankuwa word begin met 'n totaal nuwe Jurgens reeks om die mark oor te neem.

Hy bou hierdie bedryf uit en so ook die Jurgens naam, soveel so dat die eerste 'off-roader' Explorer in 1998 die lig sien. Hierdie woonwa sou die begin wees van 'n verdere opbloei in die woonwabedryf want landsgrense het oopgegaan en kon woonwaens oral gaan en selfs van die redelik onbegaapare paaie af kan die natuur geniet word. Gedurende 2007, net voor die 60ste bestaansjaar van die Jurgens Groep van Maatskappy verkoop Michael Delport die maatskappy aan die Imperial Groep.

Is ons nie nou terug in 1952 met nuwe vervaardigers, nuwe woonwaens, nuwe eienaars wat die woonwabedryf weer verder moet neem nie?

Hans Koekemoer

Al styg brandstofpryse hoe – sonder my woonwa nooit!



Knuppeldik



Wanneer die vrieskas in die woonwa geen vleis meer oplewer na 'n lang vakansie nie, kan die volgende dalk 'n uitkoms wees.

Paella op die kole of gasstofie

1X200 g-blik tuna in olie
1x 105g-blik oesters en/of gerookte mossels
1 ui gekap
1 soetrissie gekap
1 x 250 g-bakkie vars sampioene, gesny of 1 x 285-blik sampioene, water afgegooi
1 blikkie ertjies
1 x 200 g-pakkie ontpitte swart olywe
1 koppies (500 ml) rys
4 koppies (1 liter) water
1 x 32 g-pak Knorr rissiesous
Sout en peper na smaak.

Verhit die olie van die tuna en die oesters en/of mossels in 'n groot pan wat vuurbestand is. Soteer die uie en soetrissie tot deurskynend. Voeg die sampioene, ertjies, olywe en tuna by en meng goed. Voeg die rys, water en rissiesous by. Verhit tot kookpunt en prut dan oor lae hitte terwyl af en toe geroer word tot rys gaar is, ongeveer 20 minute. Voeg die oesters en/of mossels by ongeveer 5 min voordat die rys gereed is. Geur met sout en peper.

Souskluitjies in 'n ysterpot

125g botter of margarien
60ml fyn appelkooskonfyt
12.5ml koeksoda
500ml koekmeelblom (gesif)
knypie sout
100ml melk
750ml kookwater
250ml suiker
5 ml vanieljegeursel
klontjie botter (ekstra)

Smelt botter en roer dan eers konfyt dan koeksoda by (mengsel bruise). Voeg meel en sout beurtelings met melk by. Plaas oorblywende bestanddele in ysterpot en laat opkook. Skep lepelsvol deeg in kokende vloeistof sodat hopies nie opmekaar lê nie. Sit deksel op en prut 25 minute lank.

Op ligte noot



A woman brought a very limp duck into a veterinary surgeon. As she laid her pet on the table, the vet pulled out his stethoscope and listened to the bird's chest. After a moment or two, the vet shook his head and sadly said, "I'm sorry, your duck, Cuddles, has passed away."

The distressed woman wailed, "Are you sure?"

"Yes, I am sure. Your duck is dead," replied the vet..

"How can you be so sure?" she protested. "I mean you haven't done any testing on him or anything. He might just be in a coma or something."

The vet rolled his eyes, turned around and left the room. He returned a few minutes later with a Labrador Retriever. As the duck's owner looked on in amazement, the dog stood on his hind legs, put his front paws on the examination table and sniffed the duck from top to bottom. He then looked up at the vet with sad eyes and shook his head. The vet patted the dog on the head and took it out of the room. A few minutes later he returned with a cat. The cat jumped on the table and also delicately sniffed the bird from head to foot. The cat sat back on its haunches, shook its head, meowed softly and strolled out of the room. The vet looked at the woman and said, "I'm sorry, but as I said, this is most definitely, 100% certifiably, a dead duck." The vet turned to his computer terminal, hit a few keys and produced a bill, which he handed to the woman..

The duck's owner, still in shock, took the bill. "\$150!" she cried, "\$150 just to tell me my duck is dead!"

The vet shrugged, "I'm sorry. If you had just taken my word for it, the bill would have been \$20, but with the Lab Report and the Cat Scan, it's now \$150."

-----ooo0ooo---

A Boerseun and his Pa were in a mall. As they were from out of town they were amazed by almost everything they saw, but especially by two shiny, silver walls that could move apart and then slide back together again. The boy asked,

'What is this Pa?'

The father (never having seen an elevator/lift) responded, "**Son, I have never seen anything like this in my life, I don't know what it is.**"

While the boy and his Pa were watching with amazement, a fat, old lady in a wheel chair moved up to the moving walls and pressed a button. The walls opened and the lady rolled between them into a small room. The walls closed and the boy and his Pa watched the small circular numbers above the walls light up sequentially. They continued to watch until it reached the last number and then the numbers began to light in the reverse order.

Finally the walls opened up again and a gorgeous 24-year-old blonde stepped out. The father said quietly to his son.

"Gaan haal jou Ma"



'My kind, as dit Liewe Jesus se wil is...'

Daan Naudé van Karedouw skryf die volgende: So 'n bietjie humor na 'n week van minder goeie nuus wat ons daagliks moes lees. Een middag na werk het ons 'n katjie in 'n populierboom op ons plot gewaar. Die kat het klaarblyk nie nie geweet hoe om af te kom nie, en my pogings om die dier te bereik om hom uit te haal, het misluk. Selfs toe ek die kombuistrappie gaan haal, kon ek nie bykom nie want die katjie het net hoër bly klim. Ek het die stam probeer afbuig maar dit was te stram. My vrou trek toe ons motor nader en ek maak 'n tou aan die trekstang en boom vas om die boom dan met verdrag grond toe te buig. Alles werk volgens plan, maar net toe ek die katjie wou vang, glip die tou los en doer trek die katjie. Die volgende dag doen ons inkopies en loop ons ons buurman in die supermark raak. Hy het katkos, 'n sandbank met sand en katspeelgoed in sy trollie. Hy is van nature nie 'n katliefhebber nie en begin sommer dadelik verontwaardig verduidelik.



'Jy weet hoe ek oor katte voel,' seg hy. Sy een dogter (omtrent 9 jaar oud) karring al lank aan hulle om vir haar 'n katjie te koop wat botweg geweier is.

Gistermiddag, kla hy verder, het hy en sy vrou na werk so deur die tuin gestap en 'n paar bossies uitgetrek. Hul dogter was saam en het weer haar versoek vir 'n katjie gerig. Seg haar moeder: 'My kind, as Liewe Jesus vir jou 'n katjie stuur kan jy hom met liefde hou'.

'Waaragtig,' lamenteer my buurman, 'die volgende oomblik land hier uit die lug 'n verdekselse kat tussen die blomme'.

Kampprogram April-Sept

April						
S	M	T	W	T	F	S
19-21 Bosveld Oase Streekskamp						

May						
S	M	T	W	T	F	S
17-19 Drie Berge Streekskamp						
24-26 Dube - Kuiersaamtrek (Bosveld)						

June						
S	M	T	W	T	F	S
14-17 Warmbad Wintersaamtrek (NUB)						

July						
S	M	T	W	T	F	S
24-28 Manyane Snr Burger en Kuiersaamtrek (Seniors)						

August						
S	M	T	W	T	F	S
6-7 Senior Burgersaamtrek						
8-11 AJV Streekskamp						

September						
S	M	T	W	T	F	S
13-15 Shangrila Innies Bos Streekskamp						
13-14 Koppisol (NUB)						

Adverteer

RT

INSTALLATION AND MAINTENANCE

www.rtinstallation.co.za

Tel: +27 12 997 4722, Fax: +27 86 6499 588, Cell: +27 82-601-5914

(Hennie)

- ❖ Digital CCTV Monitoring System
- ❖ Photo ID System
- ❖ Biometrics Recognition System
- ❖ Access Control System
- ❖ Time and Attendance Monitoring Systems
- ❖ Guard Monitoring System
- ❖ Boom gates, Anti-Bandits door, turnstiles and etc.
- ❖ Parking Systems
- ❖ Electric Fencing
- ❖ Gate Motors
- ❖ Intercoms



Foil Forever

Verskaffers van unieke kamp produkte

Aluminium coated awnings / seile



Aluminium Hammers



Skokbrekers vir toue



Tel: 083 654 6549

Email: foil@tinel.co.za

www.tinel.co.za

Caravans/Woonwaens @ Montana

BREEDSTAAT MONTANA PARK

Sel: WILLIE 0827223925 / WIMPIE: 0769309634
RITA (TENTE) 0826514774

E-mail: willie@zawireless.co.za

Webtuiste: www.caravans-montana.com

VERKOPE

DIENS

HERSTELWERK

TENT HERSTELWERK

• VERKOPE VAN SKOON GEBRUIKTE WOONWAENS

Ons het altyd voorraad van topgehalte gebruikte woonwaens. Alle waens deur ons verkoop ondergaan 'n A – Z ondersoek en word volledig gesien en geseël en dra 'n 6 maande waarborg

• IS JOU WOONWA TE KOOP – LAAT ONS DIT NAMENS JOU BEMARK

• VERSIENING VAN WOONWAENS

Ons doen roetfine dienste op woonwaens – was en poleer- diens van hoekstutte-koppelstang-wielaaers en nog baie meer

• HERSTEL EN VERANDERINGS AAN WOONWAENS

Ons verrig 'n wye verskeidenheid van herstelwerk aan woonwaens soos houtrot, haelskade ens. asook herstelwerk vir al die versekeringsmaatskape. Ons bou ook LUGVERSORGERS EN ELEKTRIESE YSKASTE in

• TENT HERSTELWERK

Herstelwerk aan tente en seile, vervanging van ritsluiters en gaas ens. Maak van nuwe tente , Rally tente, sykante, pale en tentsakke asook spesiale pennesakke ens. Ons doen ook weerkaats seile van versterkte materiaal

KLIENTE DIENS IS ONS LEUSE